



Kamis, 16 September 2021
Ogen: Roma 12: 17-21



Meriah Mas Ise Pe



Lit sada ungkapan motivasi kerna perdamen si ituriken Albert Einstein: *perdamaian tidak dapat dijaga dengan kekerasan, perdamaian hanya dapat diraih dengan pengertian*. I bas kegeluhenta enda perlu iterapkan sikap siangkana sada ras sidebanna, 'mekepe' nandangi situasi teman si tentuna labo seri ras kita. Labo mungkin sipaksaken man kalak sideban bagi perukurenta. Labo ka banci bagi iarapkan kita e kal si ibahan temanta. Seri nge bagi kita pe lenga bo tentu kal pas iakap temanta. Jadi, adi si pejangjang sura-suranta tentu asa ndigan pe labo lit kedamen i bas pusuhta bagepe i tengah-tengah kegeluhenta.

Pedah Rasul Paulus nandangi perpulungen Roma nerusken pedah Jesus asum ia nehken pengajaren i datas uruk (Mat. 5: 44, rst) e me adi lit kalak si erban jahat man banta, ola si balas alu si jahat tapi ngasup min kita tetap ndalanken si mehuli man bana. Alu tujun bagi kata tema: gelah kita meriah ras ise pe. Sabap adi lit sada sajalah si jadi imbangta, e pe situhuna jadi baban si mberat kal i bas ukurta.

Kai si jadi gegehta guna ngelakokenca? Eme keleng ate Dibata si la ersibar iberekenna man banta. Bagi Tuhanta Jesus Kristus si memaklumi uga pe keadanta anak-anakNa. Enda me jadi usihen man banta guna ndalanken si bage rupa i bas kegeluhenta. Janah si endesken saja man Dibata, sabap guna ngukum kalak si deban labo lit hakta.

Perbahanen si ngena ate Dibata, si muliana kal eme adi melihe imbangta, siberelah ia man, adi muas berelah ia minem (ay. 20). I je me kita jadi berbeda ras kalak si la nandai Dibatanta si perkeleng e. Adi kalak sideban e nggit denga erelem-elem, nggit denga erbalas, tapi kita ngalemi e nggo jadi biak simbaru i bas kegeluhenta. Ngasup pe kita mperkuanken imbangta amin gia pelin-pelin nge ia nge si ersalah man banta.